



БУЛГАН АЙМГИЙН ЗАСАГ ДАРГЫН
ЗАХИРАМЖ

2022 оны 04 сарын 26 өдөр

Дугаар 1271

Булган сум

Авто замын төлбөр авах журам
батлах тухай

Монгол Улсын Засаг захиргаа, нутаг дэвсгэрийн нэгж, түүний удирдлагын тухай хуулийн 60 дугаар зүйлийн 60.1.2, 60.1.10, 66 дугаар зүйлийн 66.1 дэх заалт, Авто замын тухай хуулийн 30 дугаар зүйлийн 30.3, аймгийн Иргэдийн Төлөөлөгчдийн хурлын 2022 оны 9 дүгээр хуралдааны 13 дугаар тогтоолыг тус тус үндэслэн ЗАХИРАМЖЛАХ нь:

1. Орон нутгийн чанартай авто зам, замын байгууламж ашиглаж буй авто тээврийн хэрэгсэл эзэмшигчдээс авто зам, замын байгууламж ашигласны төлбөрийг авах журмыг хавсралтаар баталсугай.

2. Журмын хэрэгжилтийг хангаж ажиллахыг Санхүү, төрийн сангийн хэлтэс (Д.Батцогт)-т даалгасугай.

ЗАСАГ ДАРГА



Б.АРИУН-ЭРДЭНЭ

6320200337



**Орон нутгийн авто зам, замын байгууламж
ашигласны төлбөр авах журам**

НЭГ. Ерөнхий зүйл

1.1. Орон нутгийн чанартай авто зам, замын байгууламжийн ашиглалт, засвар, арчлалтыг сайжруулах, орон нутгийн авто замын сангийн эх үүсвэрийг нэмэгдүүлэх, эрх зүйн орчин бүрдүүлэх, хөдөлгөөний аюулгүй байдлыг хангах шаардлагын үүднээс авто зам, замын байгууламж ашигласны төлбөр авахад үүсэх харилцааг зохицуулахад оршино.

ХОЁР. Төлбөр хураах зарчим

2.1. Төлбөртэй авто зам, замын байгууламжаар зорчиж байгаа тээврийн хэрэгслээс авах төлбөрийг орон нутгийн авто замын санд төвлөрүүлэх үйл ажиллагааг Татварын хэлтэс бусад мэргэжлийн байгууллагуудтай хамтран зохион байгуулна.

2.2. Төлбөрийн хэмжээг аймгийн Иргэдийн төлөөлөгчдийн Хурлын 2022 оны IX/13 дугаар тогтоолоор баталсан тарифийг үндэслэн Булган аймгийн харъяат иргэн, аж ахуйн нэгж, байгууллагын авто тээврийн хэрэгслээс жилд нэг удаа буюу техникийн үзлэг, тооллогын үеэр хурааж орон нутгийн төсөвт төвлөрүүлнэ.

2.3. Төлбөр хураах ажиллагаа нь тээврийн хэрэгслийн хөдөлгөөнд саад учруулахгүй байхаар зохион байгуулагдсан байна.

Гурав. Төлбөрийг захиран зарцуулах

3.1. Төлбөрийг орон нутгийн авто замын санд хуримтлуулна.

3.2. Захиран зарцуулах эрх аймгийн Засаг даргын мэдэлд байна.

3.3. Орон нутгийн авто замын санд төлбөрийн хэлбэрээр хуримтлагдсан орлогын 25 хүртэл хувийг постын байнгын үйл ажиллагааны зардлыг санхүүжүүлнэ.

3.4. Үлдсэн 75 хувийг орон нутгийн авто замын сангийн нэгэн адил орон нутгийн чанартай авто зам, замын байгууламжийг шинэчлэх, засварлах, арчлах, тэдгээрийг тоолох, данс бүртгэлд тусгах, эзэнжүүлэх, тэмдэгжүүлэх, авто замын хураамжийг хуримтлуулахтай холбоотой тасалбар, наалт, бусад зардлыг санхүүжүүлж болно.

3.5. Дээрх үйл ажиллагаанаас бусад зүйлд зарцуулахыг хориглоно.

Дөрөв. Хариуцлага

4.1. Дээрх журмыг зөрчсөн хувь хүн хуулийн этгээдийг холбогдох хуулийн дагуу хариуцлага хүлээлгэнэ.